

21/02/1999

PM tidak sokong Bersekutu

Lichong Angkui; Muhd Yusuf Abu Bakar; Shamsul Kamal Amaruddin
KOTA KINABALU: Datuk Seri Dr Mahathir Mohamad menegaskan beliau tidak menyokong pemimpin Parti Barisan Rakyat Sabah Bersekutu (Bersekutu), Datuk Harris Salleh, walaupun pernah bertemunya di Kuala Lumpur baru-baru ini.

Sehubungan itu, Perdana Menteri berkata Barisan Nasional (BN) tidak akan menerima pemimpin dari luar parti komponen yang menubuhkan parti untuk menentang BN pada pilihan raya negeri akan datang.

"Saya tidak fikir BN akan menerima dia (Harris), orang yang menubuhkan parti politik untuk menentang kita ... tidak ada jalan yang boleh menerima parti pembangkang," katanya dalam sidang akhbar pada akhir lawatan tiga hari ke Sabah di sini tengah hari semalam.

Mengenai pertemuan dengan Harris di Kuala Lumpur, Dr Mahathir berkata, beliau bersetuju menemui Harris berikutan ada orang mencadangkan Harris berjumpa dengannya untuk berbincang.

"Saya kata okeylah ... dengar apa yang dia nak cakap ... Harris kata BN akan kalah (dalam pilihan raya negeri Sabah) dan partinya akan menang. Jadi dia minta saya menyokongnya kerana penduduk Sabah sudah menyokongnya. Itu mimpinya," kata Perdana Menteri.

Beliau turut menolak dakwaan kononnya parti Bersekutu mewakili masyarakat Islam di Sabah.

"Saya fikir orang Islam di sini sedar Bersekutu bukan nak mewakili orang Islam. Ia cuma mewakili pemimpin yang pentingkan diri sendiri ... bila ada pilihan raya baru tubuh parti untuk bertanding," katanya.

Mengenai pertemuannya dengan pengusaha pelancongan Sabah pagi semalam, Dr Mahathir berkata beliau mendengar taklimat mengenai masalah industri pelancongan di negeri ini.

Katanya, beliau akan membawa masalah pengusaha pelancongan di Sabah ke pengetahuan Majlis Tindakan Ekonomi Negara (MTEN) untuk diselesaikan.

Menurutnya, beliau sendiri akan mengadakan perbincangan dengan MTEN sebagai usaha mencari kaedah terbaik mengatasi masalah berkaitan promosi pelancongan di negeri ini.

Antara masalah dikenal pasti ialah kekurangan penerbangan ke destinasi tertentu di negeri ini serta berhubung penerbangan sewa khas.

"Saya mengambil ingatan terhadap perkara yang dibangkitkan dalam taklimat itu termasuk mengenai masalah berhubung penerbangan ke Sabah," katanya.

(END)